




臣朱壽朋敬編

臣潘鴻鼎恭校

八月庚申朔夕 月於西郊遣載勛恭代行禮○岑毓英奏現在清理省中公事就緒擬卽渡臺查勘防務報聞○岐元等奏朝鮮貢使洪佑昌中途被賊拒傷搶去銀兩請將防護不力之小黑山界官驍騎校恩魁新民廳撫民同知廉隅先行摘去頂戴勒限三個月嚴緝賊賊務獲得 旨恩魁廉隅均著先行摘去頂戴勒限嚴緝○李肇錫奏致治之道莫要於安民安民之法莫先於擇吏牧令之賢否民生之休戚繫焉故欲謀保聚重撫綏必自慎選牧令始自軍興籌餉以來流品之雜已極矣我 皇太后 皇上洞悉其弊於庫款支絀之時毅然停止捐輸薄海臣民無不仰頌 聖明共識端本澄源之至意而臣竊以爲捐輸之停止所以肅吏治也吏治之肅所以期澤之下逮乎民也夫親民之官孰有重於州縣乎數十年來各省捐納需次人員固已不少近則領照到省者又復紛至沓來此中原不乏奇傑之士而要其得人之盛未必過於正途而弊之中於地方者則惟州縣爲尤甚約舉之蓋有二焉溯自捐例屢次減成殷實之家挾資數千金卽已儼然居民上彼其積累之餘曾無損於毫末第以仕途爲光寵而已而豪奢成

習幸處脂膏則肆其揮霍不幸而缺分稍瘠勢必至於虧帑剝民此弊在有餘者也而竭蹶集資之流又往往日暮途窮視一官爲取償之計一旦履任計毋取贏不充其囊橐而不止縱或終以墨敗而寬典可邀亦僅降調耳褫職耳厚資坐擁曾不失爲富民此弊在不足者也臣不敢謂正途人員之果無此弊而我朝科目取士歷久不廢事例偶開因時輒止此其爲經爲權孰輕孰重固已昭然可睹矣夫既准其捐納於前自不能概置不用使才俊有向隅之歎而擇其尤要者裁制而損益之固未嘗無術也伏查吏部奏定章程各省道府部選缺出本省題奏咨報所開各缺俟本省留補二次卽應咨部銓選一次以三缺爲一週不得參差撓越等語蓋恐選補二項消涉偏枯故以限制爲疏通法至善也臣請竊仿此意各省州縣缺出無論煩簡留補部選每缺用正途人員二次始間用捐納人員補選如再無人始准以捐納人員借補過班若捐納應補選班無人亦如之其法於兩途均屬持平毫無軒輊特選補之缺正途較多一次積計之似屬稍優不知行之十數年捐納日見其少而正途如故再歷數十年將並無捐納而惟存正途得缺之多於捐納初無所爲滯礙也擬請飭下吏部詳核定議除軍功人員及丞倅簿尉無預地方之責者仍照舊章銓補外此後州縣缺出可否如臣所擬變通辦理務祈於馭吏之中寓救弊之意況在瘡痍後元氣宜培司牧得人而後小民蒙福時政急務無逾於此上諭御史李肇錫奏州縣宜多

用正途請飭妥議章程並特旨內用人員選補班次請酌量變通各摺片著吏部議奏○辛酉 上詣

觀德殿 孝貞顯皇后几筵前行禮○癸亥諭刑部奏朝審人犯呼冤請派大臣會訊一摺本年朝審臨

時呼冤之楊樹田卽楊二一犯著派大學士會同刑部再行覆訊具奏○甲子諭軍機大臣等禮部奏請

飭催朝鮮香貢趕緊解京一摺據稱朝鮮國恭進香貢已於七月間該國使臣照例將貢物交盛京將軍

派員解送迄今尙未投到請飭趕緊解送等語現距九月初九日 孝貞顯皇后梓宮奉移日期甚近典

禮攸關豈容耽延遲誤著恩福松林飭令解送香貢委員趕緊解送毋稍遲延並著李鴻章童華游百川

謙德卽行派員迎接妥速解京以昭敬慎而免貽誤將此諭知童華游百川並諭令李鴻章恩福松林謙

德知之○諭前據御史邵積誠奏參福建道員葉永元等各欸並革員舒之翰潛往福建出入將軍衙門

倚勢招搖等情當諭令何璟岑毓英查辦茲據該督撫查明具奏福建督糧道葉永元鹽法道翁學本候

補道盛世豐漳州府知府毓璋據該督撫查明並無劣跡仍著隨時留心查看毋稍迴護龍巖州知州聯

興才具平常尙無貪婪實跡惟信用家丁精力漸衰著勒令休致署晉江縣知縣調補鳳山縣知縣張星

鐸操守尙好並無買妓爲妾情事惟不免恃才身體亦弱著撤任查看福安縣知縣徐承禧前在長樂縣

任內赴鄉催糧有村民聚眾抗糧奪犯並無毆官情事現任福州縣事尙無劣跡若始終異轍卽行嚴參

臺灣縣知縣潘慶辰染患痰疾辦事顛預家丁因而作弊被參藉修神廟苛罰勒捐一事應行澈底查究  
著先行革職審訊仍著該督撫懷遵前旨破除情面認真整頓以肅吏治已革道員舒之翰據稱查明該  
革員於穆圖善未到任以前經李鴻章差往福建穆圖善並未容留亦無逗留干預各情該革員業已銷  
差著毋庸置議○諭昨據刑部奏朝審人犯楊樹田卽楊二臨時呼冤當有旨派大學士會同刑部再行  
覆訊茲據給事中戈靖奏請將此案飭交刑部會同都察院研鞫一摺著仍交大學士會同刑部悉心審  
訊具奏總期無枉無縱以成信讞○諭給事中戈靖奏戶部廣東司書吏冒領恤銀一案雖經該司郎中  
額勒精額查出奏交刑部歸案辦理惟辦公草率請撤去差使等語著戶部堂官查明覆奏○諭給事中  
戈靖奏鑲白旗蒙古佐領崇惠恃伊弟崇林充當理藩院蒙古庫倫領催勾通理藩院書吏高振廷等與  
朱慶雲朋比爲奸數年來冒領蒙古卹賞銀不下數萬請清查究辦等語事關官吏舞弊冒領卹賞亟應  
澈底查究著理藩院堂官查明覆奏○乙丑荊州將軍景豐卒予卹如例並准入城治喪子福勒洪額賞  
給主事○以御驃圖當差宋順騎馬闖入東長安門交刑部從重治罪○丁卯祭 先師孔子廟遣靈桂  
行禮○戊辰祭 社 稷壇遣世鐸恭代行禮○世鐸等奏伏讀七月十一日 上諭本年九月初九朕  
奉 慈禧端佑康頤昭豫莊誠皇太后恭送 孝貞顯皇后梓宮奉移 普祥峪 定東陵永遠奉安等

因欽此仰見 皇上 聖孝肥誠盡哀盡禮之至意臣等曷敢妄行瀆請惟思 皇太后 慈躬甫報大

安氣體尚未復元飲食起居正資靜攝九月中旬節交冬令天氣已寒若往返長途復加傷感於 節勞

頤養之道均不相宜論者或謂 皇太后未可遽勞 皇上自當恭送庶幾事出兩全第念 聖主尙在

冲齡隨侍 慈闈事事皆資調護自 入承大統以來晨昏相依未嘗有一日之間若 乘輿遠出必致

慈懷厯系昕夕難安仰維 皇太后 訓政勤勞一身實繫 宗社之重況 孝貞顯皇后不幸棄天

下臣民值此時事多艱軍國萬幾專賴 璇宮裁決設因遽注過切致於頤養之道有疏益將上獻 宸

衷下殷民望知 孝貞顯皇后在 天靈爽必將愍然不安卽揆諸 列祖 列宗佑啟垂眷 神靈亦

恐無以仰慰伏思 天子之孝以仰承 付託爲先經云禮時爲大又云禮以義起勢之所阻情之所迫

卽爲時之所限義之所生臣等雖甚愚昧亦知仰體 皇太后悲思 孝貞顯皇后之至誠 皇上慎終

追遠之孺惻何敢導 聖人以闕禮之愆特以熟念 皇太后與 皇上既有不能遽禮之情 宗社萬

世之奠安與聖山陵一時之典禮實有相較尤重之義所關太鉅不敢緘默不言惟於無可如何之時爲

酌經從權之請伏查康熙二年 世祖章皇帝梓宮永遠奉安諸王大臣引禮止 駕遠送復經 孝莊

文皇后懿旨諄切 聖祖仁皇帝勉從 慈命未赴 山陵禮有經權固天下後世所共諒臣等公同商



議惟有籲懇 皇太后 皇上仰循 成憲勉抑哀忱停止 躬送以上慰 孝貞顯皇后在 天之靈  
而副中外臣民之望如蒙 俯允所請具一切應行典禮請 旨飭下各該衙門敬謹妥爲辦理臣等不  
勝迫切屏營待 命之至 上諭本年九月初九日朕奉 慈禧端佑康頤昭豫莊誠皇太后恭送 孝  
貞顯皇后梓宮奉移 普祥峪 定東陵永遠奉安業經降旨令各該衙門敬謹預備嗣經大學士全慶  
尙書萬青藜志和毛昶熙翰林院侍講學士鈕玉庚周德潤侍講高萬鵬國子監司業王邦璽御史鄭溥  
元李士彬孫紀雲蕭韶丁鶴年先後陳奏或稱 慈輿未可遠涉郊垌或謂朕亦未可暫離左右本日復  
據王大臣等合詞籲懇奏稱 皇太后訓政勤勞實係 宗社之重現在甫報大安尙未復元往返長途  
復加傷感於 節勞調攝均非所宜又以朕依侍 慈闈事事仰蒙調護若暫疏定省必致昕夕 塵懷  
亦非頤養之道謹遵康熙二年 聖祖仁皇帝成憲停止躬送等語情詞肫摯出於至誠披覽之餘曷勝  
悽愴仰惟 皇太后聖躬甫臻康豫衝寒就道時歷旬餘誠非所以資保衛而昭慎重謹據王大臣等所  
奏竭誠籲請仰蒙 垂鑒微忱俯允停止往送朕受 孝貞顯皇后顧復深恩 昊天罔極值此 奉安  
大典不克盡哀盡禮此心何以自安茲奉 皇太后懿旨皇帝尙在沖齡銜哀遠出懸系實深諸王大臣  
等所陳係仰體萬不得已之苦衷爲此酌經從權之請尙其以 付託爲重勉循 成憲俯順羣情允如

所請欽此 慈命諄切敢不祇遵敬念 靈輿在道永奠 山陵未獲躬親大事夙夜兢兢負疚何極將來諏吉舉行恭謁典禮再行侍奉 皇太后敬詣山陵虔申誠悃此次應派近支王公恭代行禮及一切應行典禮著各該衙門詳稽例案酌議具奏○以本格署鑲黃旗蒙古都統○以祥亨爲荊州將軍謙福爲察哈爾都統奕榕爲寧夏副都統○樓譽奏六月十六日恭奉 上諭澄敘官方察吏實爲急務各省督撫考核屬員率多虛應故事不足以示勸懲至冗員過多亟應照章甄別將庸劣各員隨時裁汰毋任日久濫竽各等因欽此仰見 皇太后 皇上整飭吏治之至意然數月來各省督撫尙無應者臣謹以吏治之弊約略陳之州縣爲民生之根本州縣得其人則百姓安州縣不得其人則百姓擾近來之最巧而最害者以同通署理州縣爲首而老幕盤踞次之應迴避不迴避次之在服官省分置買田產與民爭利又次之 朝廷設官各有等差同通州縣本係四班毋庸混雜咸豐軍興以後人少不得不借用現在實在及候補州縣每省數百員何至無才各督撫且請停分發如何再可侵越查同知五品通判六品爲州縣之升階以同通署州縣升降之權倒置而得之者以爲喜與之者以爲恩是誠巧宦之尤者矣保舉同通類皆情面一二次列名居然實官捐納同通所費不過數百金亦居然實官到省後百計鑽營無微不至督撫以爲能使署州縣事權在手威福自擅不知地方之利弊惟求私橐之充盈稍分其肥以結



督撫之幕友官親遂相交譽故小民恨如切齒而督撫猶以爲能員也前奉部章四缺得一此風稍熾然嚴其得缺轉速其貪婪輪委既艱旅食益大一旦署事不剝盡脂膏不止而地方更不可問矣則何如絕其署理州縣之路之爲無弊也況同通自有同通之缺州縣宜歸州縣之班於國家分職初意亦屬相合應請 特旨飭下各省督撫以後各用本班現在保舉捐納同通不由州縣班而署州縣一概先行撤任勒令補交州縣本班實銀以懲取巧以定名分庶州縣有專司不致付民生於不問矣幕友本佐政事而久事盤踞則弊端百出近來各省督撫司道各衙門沿用幕友往往老於其位歷數任而不更遂視爲固有者公事付之子弟已則逍遙事外聚賭博肆招搖受規禮織訟辭甚且時行賄賂廣通聲氣幕友本係寒士何以便成巨富則其平日之貪廉自見督撫司道之明察者亦或知之而根深蒂固莫可動搖亦遂任之迨至決裂即使驅逐亦貽害不淺則何如先事豫防之爲得也應請 旨飭下各該衙門嚴加查訪不得沿用慣弊老幕斯盤踞之術窮而政亦可理矣至於迴避人員例定綦嚴近來亦視爲具文前經御史奏請查辦雲貴二省臣聞他省亦間有之有父兄爲司道幕友而子弟爲候補州縣者有父兄爲候補道府而子弟候補同通州縣者至兩浙兩廣兩淮各有鹽務省分更多應行迴避人員在鹽務雖不理民事而其互相瞻徇則一也應請 旨飭下各省一體查辦勒令迴避則情面庶可稍戢矣至服官省分例

不准置買田產開設店肆乃近來各省官員無不犯此禁其已罷官者猶可言也不謂督撫方畀以事權而產業卽因之日廣微論有玷官箴卽此孜孜爭利之心可決其居官之不廉其始亦畏人知假他名以混之及至久而坦然不疑相率效尤幾視之爲當然者應請 旨飭下各督撫認真查辦不得以空言塞責若猶粉飾當予嚴懲 上諭給事中樓譽奏敬陳管見一摺各省督撫司道衙門應用幕友自當慎

選品行端方明習吏事者以資助理若如所奏竟有日久盤踞聚賭招搖各情甚至肆行賄賂廣通聲氣於吏治大有關係著各督撫嚴行查察如有似此劣幕立即驅逐並嚴飭司道等一體訪查不准徇情遷就致滋弊竇至服官省分置買田產例禁甚嚴並著各督撫認真查辦毋稍徇隱其所請將同通州縣各用本班及各省迴避人員一體查辦兩條著該部議奏○己巳予山東蘭山縣烈婦姚任氏安徽霍邱縣孝婦江臺氏旌表○庚午中巴條約成其文曰 大清國 大皇帝大巴西國大皇帝切願敦睦之誼俾兩國均獲利益公訂和好通商行船條約是以 大清國 大皇帝特派 欽差全權大臣太子太傅

文華殿大學士兵部尙書都察院右都御史直隸總督一等肅毅伯加騎都尉世職李大巴西國大皇帝特派欽差全權內大臣勳賜佩帶羅斯並土爾其墨基地噶各等寶星喀各將所奉上諭互相閱看均屬妥善卽經議定條款如左 第一款 嗣後 大清國與大巴西國暨厥人民永存和好永敦友誼彼

此皆可前往僑居須由本人自願各獲保護身家財產並一體與相待最優之國民人同獲恩施利益

第二款 此次定約以便嗣後往來通好 大清國 大皇帝可派使臣駐劄巴國京都大巴西國大皇

帝亦可遣使臣駐劄中國京都各准兩國使臣並眷屬隨員人等前往彼此京城或常川居住或隨時往

來一遵本國之 旨兩國使臣在公署時享獲種種恩施與待最優之國使臣無異 第三款 兩國於

彼此通商口岸設立總領事領事副領事並署領事等官均聽其便惟此等官員必須奉到駐劄之國批

准文憑方得視事其臨時彼此交發文憑均無費用所派領事官必須真正官員不得以商人兼充亦不

得兼作貿易各口倘未設領事官或請別國領事兼代亦不得以商人兼充或卽由地方官照現定條約

代辦兩國領事官享獲種種恩施與彼此所待最優之國領事官無異至商民交涉事件有與本地官民

齟齬者領事官均不得任意爭執如領事官辦事不合彼此均可按照公例卽將批准文憑追回 第四

款 中國人民在巴國如安本分但能不違巴國律例章程無論何處任便游歷巴國人民亦准前往中

國內地游歷須由領事官照會關道請領印照前往回日繳銷其印照繕寫中巴兩國文字所經過地方

如飭交出執照卽應隨時呈驗該民僱人僱船僱車裝運行李不得攔阻如其照內有誤以及查出沿途

或有不法情事卽送交就近領事官查辦惟於途中止可拘禁不得陵虐如在通商各口出外游玩者地

在百里之中期在五日之前可毋庸請照至於船上諸色人等不在此例如有上岸應由地方官會同領事官另定章程妥爲彈壓 第五款 中國民人准赴別國民人所至之巴國通商各處往來運貨貿易巴國民人准赴別國民人所至之中國通商各口往來運貨貿易嗣後兩國如有優待他國利益之處係出於甘讓立有專條互相酬報者彼此須將互相酬報之專條或互訂之專章一體遵守方准同沾優待他國之利益 第六款 兩國商人商船凡在此國通商口岸即應遵從此國與各國原議續議通行商務章程辦理至進出口稅則亦不能較相待最優之國或有增加 第七款 兩國兵船可以赴別國兵船所至口岸彼此接待與相待最優之國無異一切買取食物烟煤甜水修理船隻各無阻礙該兵船進出口一切稅鈔俱不輸納巴國兵船管駕官中國地方官與之平行相待 第八款 兩國商船准在彼此通商各口往來運貨貿易彼此相待與別國商船無異倘兩國船隻遇有天災在彼此沿海地方收口者該處官員自當設法相幫所有未遭失險之貨物如不欲出售自應不納稅銀遇險船隻兩國均與待別國船隻一律 第九款 巴國人民在中國遇有控告華民事件皆應先稟領事官查明根由先行勸息使不成訟華民有赴領事官控告巴國民在中國者領事官亦應一體勸息間有不能聽勸者無論原告或係華民或係巴民皆專由被告所屬之官員公平訊斷 第十款 巴國民人在中國有被華民違

例相欺准地方官查拏照例審辦華民有被巴國人在中國違例相欺巴國官亦按例查拏究治總之兩國民人交涉財產犯罪各案俱由被告者所屬之官員專行審斷各照本國律例定罪惟連欠案件應由欠戶所屬之官員勉力設法使其償還竊盜案件應照被告者之國律例辦理兩國官員均不能代償至中國民人遇有本身犯案或牽涉被控凡在巴人公館寓所行棧及商船隱匿者由地方官一面知照領事官一面立即派差協同設法拘拏不得庇縱指留 第十一欸 巴國屬民在中國有自相控告案件不論人產皆歸巴國官查辦設與別國有事在中國涉訟應由巴國領事與該國領事辦理以上案內如牽涉中國人仍應按前兩欸辦理若將來中國與各國另行議立中西交涉公律巴國亦應照辦 第十二欸 凡兩國船隻駛至通商口岸本船諸色人等如有上岸滋事各照兩國常例拏辦至巴國船隻在中國沿海通商口岸有與本地船隻相碰互控情事可由被告所屬之官員查照各國碰船現行章程審理倘未甘服應聽原告所屬之官員照會審理之員秉公復審核斷了結 第十三欸 中國民人在巴國有控告事件聽其至審院控告應得名分與巴國民人及與相待最優之國民人無異 第十四欸 中國與巴國彼此商定中國商民不准販運洋藥入巴國通商口岸巴國商民亦不准販運洋藥入中國通商口岸並有此口運往彼口亦不准作一切買賣洋藥之貿易所有兩國商民無論僱用本國船別國

船及本國船爲別國商民僱用販運洋藥者均由各本國自行永遠禁止此係兩國公同商定不得引一體均霑之條講解 第十五款 此次所定條約係用中國文巴西文法國文各四紙業經公同譯校各

相符合毫無訛誤嗣後如有彼此不明之處除各用本國文字外兼以法文爲正 第十六款 日後兩

國若於現議條款內有欲行變通之處應俟自互換條約之日起至滿十年爲止先期六個月彼此備文知照如何酌量更改方可再行籌議若未曾先期聲明仍照此次議定條約辦理 第十七款 今將以

上議定條約由兩國 欽派全權大臣先行畫押蓋印用昭憑信一俟兩國 御筆批准或在上海或在

天津彼此卽行互換後再刊刻通行使兩國官民咸知遵守○湖南提督鮑超奏請於湖南及四川夔州

建立靈軍昭忠祠得 旨著各該督撫查照奏案卽行籌款辦理○李瀚章奏湖北潛江縣大澤口支河

爲分洩襄水要道沔陽劣紳勾串居民於澤口內河何家垸地方違禁築壩值汛漲衝決延及楊家場新

挖月堤致下游各處居民猝不及防受害較重請將肇事之副將銜補用參將王子芳革職示儆得 旨

如所請行○李鴻章奏 臣於光緒六年八月初一日遵 旨與巴西使臣喀拉多等議立通商條約彼此

畫押鈐印嗣因禁販鴉片一節尙未列入約內喀拉多旋接該國電報商請添作條款並欲將原約少加

更改以期兩國有益屢次會議及各條酌改字句情形經 臣於本年閏七月初八日照鈔約稿詳細奏明



在案喀拉多於八月初二日由滬回津函稱接到本國外部電覆謂此次所改各節可以允行卽將新約畫押嗣據照會禁販鴉片添作條款現已重繕約本酌改妥協請定期彼此畫押蓋印應將前次之約作爲廢紙等因臣卽照覆以中國與各國已訂之約向不能於未換以前另議刪改今因於兩國有益且爲通商和好起見通融辦理並聲明倘非該國允將禁販洋藥添入條款臣亦未便曲徇所請等語以備將來他國或有援引可以設詞抵制遂訂於八月十一日臣督同署理津海關道周馥等會同巴西使臣喀拉多在公所畫押蓋印卽將原約作爲廢紙其改定條約仍配用中國文巴西文法國文各四紙校對無訛彼此各存正副本二分以便屆時互換奏入報聞○岐元等奏圍場前撥官兵二百名遇缺改由圍地旗丁挑放以歸簡易下兵部知之○清安等奏科城旗綠戍守官兵月支鹽糧不敷餉口援案懇 恩加增鹽菜銀兩以濟艱窘下部議奏○辛未以九月初九日奉移 孝貞顯皇后梓宮派恩麟梅啟照恭送○黎兆棠奏請調直隸試用道呂耀斗到閩充船政提調以資臂助允之○壬申命崇福來京以麗際雲爲湖南布政使蒯德標爲湖北按察使○命李明墀來京調涂宗瀛爲湖南巡撫○以李鶴年爲河南巡撫勒方琦爲河東河道總督林肇元爲貴州巡撫沈應奎爲貴州布政使葉伯英爲陝西按察使○諭戶部奏遵旨查明覆奏一摺戶部郎中額勒精額既據該堂官查明該員平日遇事整頓一切差使均能實

心經理至書吏冒領卹賞一案該員查出卽自行檢舉請將人犯送交刑部辦理並非草率給事中戈靖所請將該員撤去差使之處著毋庸議○衛榮光奏晉邊之歸綏包頭控扼草地毗連大青山暨後山一帶形勢遼闊南抵殺虎口六百餘里西逾纏金八百餘里東接得勝口亦數百里均與回疆蒙部犬牙相錯溯自軍興以來征調四出官則來去無時勇則招遣莫定其中游惰之徒實緣伏匿遂恃此爲遁逃淵藪又其地多屬蒙古游牧近年赴口開墾者往往謀搆爭利仇殺相尋日久失業亦遂勾結匪類肆其擾害從前因卓勝軍扼紮皇甫川包頭一帶爲之屏蔽自三年卓軍西去卽經前撫臣曾國荃招募湘毅軍填紮該處地方賴以安靜上秋湘軍東調雖將樹軍裁剩右營擇要布置而馬步四旗礮隊一哨爲數僅止一千二百餘人責令分巡千餘里之防此往彼來疲於奔命以故上冬與本年四五月間邊口地方卽有囂然不靖之勢迭據大同鎮張樹屏以地廣兵單難於兼顧非添派防營不足以資震懾等情咨商前來臣查口外地方荒野非如內地有村鎮城池可以阻遏亦不如內地有墩汛兵役可以稽查而且居無四隣人皆野處卽白晝劫奪何所忌畏況游惰各匪積年混跡其間此拿彼竄習爲故常弱食強吞已非一日若不有犯卽懲至此輩賊膽日肆馴至如奉天吉林馬賊大肆鴟張其滋擾蒙古生計固屬可虞而嘯聚日多當此邊塵未靖之秋尤恐養成巨患是添派防營一事實屬當務之急所難者屢飢之後司庫

支絀萬分既不敢率准增竈又未便置爲緩圖再四思維惟有就大同額設馬兵揀派七百八十名查照  
晉省練軍章程編作前後左右中五旗由張樹屏派員管帶俟成軍後擬飭左右中三旗分紮口外三舍  
必嚴察素齊大宗太等處前後兩旗擬飭分紮口內之陽高岱岳等處劃定汛段聯絡巡防藉輔樹軍力  
所未逮至所以專練馬隊而不挑練步隊者蓋以平原曠野必以逐捕爲先如教練得法將來樹軍裁撤  
有此項馬隊馳驅奮擊既可張邊鄙聲威亦足開綠營風氣似於邊防營務兩有裨益下部知之○癸酉  
左宗棠因病奏請開缺不允予假兩月調理○諭御史李郁華奏道府等官起復吏部知照軍機處及軍  
機處進軍請畫一辦理等語向來曾任實缺道府丁憂起復後赴部投供吏部於此項人員內應否知照  
軍機處自有定章吏部知照後軍機處應否進軍自應查照向章分別辦理豈容妄事更張所奏著毋庸  
議至所請將道府煩缺調煩卓異人員起復後仍發原省補用之處著吏部議奏○諭御史李郁華奏湖  
南州縣勒索陋規設立私牢請飭嚴禁一摺據稱湖南新化縣遇有命案先令兩造交下廠費制錢數百  
千不等詣驗時吏役動至百數十人復有搭廠填格等費設立東班房西班房快班房私牢數處敲撲陵  
虐痠斃疊疊無名白役不下一二千人每案簽差多至十餘人鄉民恣其魚肉等語州縣爲親民之官自  
應潔己奉公約束吏役豈得婪索陋規多滋擾亂著湖南巡撫查明如有前項各弊卽飭嚴行禁革並通